

C'ERA 'NA VOTA BAGHDAG

Baghdad era na' vota, sulu regnu di magia:

odalischi, maghi, fati, tuttu sulu fantasia.

Li sintuti "milli e na' notti" ddà nasceru e su' famusi,
di ddà sunnu tanti storii, tanti cunti, tutti veru fascinusi;

e Baghdad nte chiù beddi storii vinni sempri ammintuata,

ma ora si viri a la tv, sempri e sulu 'bbummardata.

Lu turruri regna ora, cu' la verra, lu disordini e lu scantu,
stragi di tuttu, sempre morti, distruzioni pi' sa' quantu.

Quantu morti ddà ogni jornu, è na' cosa spavintusa,

autru chi favola, si po' ormai sulu parlari di na' storia ruvinosa.

Potrà Baghdad mai chiù turnari china di vita, di biddizza, d'armonia,
di cirtizza, paci, amuri, cu' tanticchia di poesia?

Quannu na' benda copri a vista, è difficili canciari,

quannu 'ntesta resta sulu a vogghia di vuliri cumannari.

E sia Diu Onnipotenti, chi ogni cosa po' aggiustari,
chi finissiru orienti e occidenti di vulirisi supraffari.

Si pi' casu poi 'u petroliu, pi' magia, tuttu siccassi,

megghiu si fussi Diu-Allah chi accussi... lu eliminassi,

tantu 'ntressu scumparissi, l'aria fussi chiù pulita
e forsi qualchi virità vinissi a essiri capita.



MA UNNI STA STU' PAISI ?

Un jornu chi me figghiu sturiava a giografia,
cu' nautru cumpagnu, li sintia parlari:

" **li regioni d'Italia e i capitali nemu a 'mparari boni pi' dumanì**".

U' prufissuri però 'un nnì parlau di sta' città, chi si senti nominari
pi' radio, televisioni, giornali e puru a me' patri ci l'hau 'ntisu ammintuari.

" Ma veramenti hai raggiuni, unn'è sta' Tangentopoli?"

Ne chi pi' casu è 'nvintatu comu Paperopoli? "

" E mancu 'nta l'autri stati jò lu truvu!"

Poveri picciriddi accusì 'ngenui!

Speriamo chi quannu crisciti, sta' città 'mmaginarìa e fasulla
putissi scumpariri e chi 'nta carta geografica di " **l'umanità** "

s'attruvassi finalmenti qualchi paisi chi si chiama " **Amuri e Onestà**".



‘A BEDDA STACIUNI

Quannu veni ‘a staciuni
jò mi sentu un pappagghiuni,
chi ‘un posa tantu a longu
ma svolazza sempri ‘ntornu,
felici forsi di campari,
senza stari mai a pinzari.
Quantu è bedda ‘a staciuni,
suli, luci, tanti çiriuri!
La campagna è na’ biddizza
“dintra” si prova la ricchezza
di goriri lu bon tempu
chi fa stari chiù cuntentu.
Lu bon tempu è comu a paci
e lu cori ascuta e taci,
ammirannu li culura
sempri beddi, da natura.
Li jurnati ora chiù longhi, quasi sempri calurusi,
li nuttati spensierati e assai spissu supurusi.
Sia ‘n muntagna, sia a lu mari
sia ‘ncampagna, unni ti pari,
la staciuni è sempri bedda
e assai megghiu s’assapura cu’ ‘na longa passiatedda.
A’ metà da camminata,
sutta n’arvulu assittata,
sentu ‘na musica speciali,
è lu cantu di cicali.
Chiuru l’occhi e pensu: chista è a vita chi cummeni,
paci, quieti, ‘a saluti e poi vai
unni è chi u’ ventu veni!



‘UN HA MAI CANCIATU NENTI

L’omu nasciu cu’ na’ testa chiù o menu di capiddi cummighhiata
du’ occhi, un nasu, du’ oricchi, ‘na vucca fatta anche pi’ la risata,

un ciriveddu sia chinu o... anchi vacanti
du’ vrazza, du’ manu, du’ ammi, du’ peri leggi oppure anchi pisanti.

La fimmina lu stessu cu’ qualchi diffirenza
cu’ l’omu va firriannu e spissu è ‘mpinitenza,

picchè ci tocca supputtari certiruni situazioni
chi l’omu unn’ ha mai avuto, picchè, pi’ prima purtau li pantaluni.

E poi li casi di stu’ munnu ‘un hannu mai canciatu:
ingiustizi, liggi fasulli, verri, malatii hannu semprì suprastatu.

La paci unn’ ha mai rignatu a longu e senza ‘mpedimenti
tutti l’hannu circatu, la cercanu e ‘un hannu cunchiurutu nenti.

Macari machiniannu qualchi scenziatu
truvassi qualchi prodottu beddu appropriatu

pi’ **“lavari e disintossicari”** lu dintra di la menti,
canciassi accussì ‘nta stu’ munnu tanta genti,

e l’umanità ‘un gghissi certu, a catafascio, a rutuliuni,
sicuramenti si campassi cu’ amuri, sentimenti e cu’ raggiuni.



UNNI POZZU CCHIÙ

'Un pozzu chiù sentiri la musica da' radiu;
'un pozzu viriri nu spettaculu giustu, beddu, variu,
pi' 'un parlari di li picciriddi li programmi,
cartoni lari, assurdi, troppu strammi.

'Un pozzu chiù sentiri parlari di la genti
di violenza, di droga, di rossi delinquenti.
'Un pozzu fari un passu chi sentu darrè a mia
parulazzi vastasi, ditti accussi, pi' macabunnaria.

Ma signuri mei, haiu forse tortu a diri
chi certa musica è sulu scrusciu e 'un si po' digiriri.
Li programmi di la tv fannu veniri l'esaurimentu
e li notiziari fannu stari mali, sunnu un turmentu.

L'erucazioni unn' è chiù praticata,
ogni comportamentu è tutta vastasata.
'Un pozzu chiù campari ntà stu' munnu accussi,
e si nni parlu e vogghiu sapiri lu picchi

addivintamu tutti egoisti e strafottenti,
ognarunu tistia, ma 'un sapi riri nenti.
Sulu si taliu l'arvuli, lu cielu, li çuriddi
sentu l'acidduzzi cantari o staiu a osservari i stiddi,

dicu chi nta' stu' munnu vali ancora stari
e chi di tuttu u' restu nun m'havi chiù 'mpurtari!



ER PATRIOTTISMO

Tutti sapemo che Roma è “**er core**” de l’Italia nostra nazione,
 perciò doverìa, parlanno d’essa, scrivere in dialetto romanesco!
 Ma sugnu siciliana e, secunnu di l’ispirazioni
 scrivu no’ me’ dialettu unni megghiu rinesciu!

Roma, comu dicia prima, è a nostra capitali,
 parlano li so’ monumenti, li so’ strati, cantanu i so’ funtani.
 È china di storia, d’arti, d’ogni ricchezza
 tuttu a Roma sapi di gloria, di biddizza,

biddizza poi all’Italia ‘un ci manca
 d’ammirari, ogni cosa mai unu si stanca
 unni ti voti voti, resti allucutu
 visitannu lu jardinu di l’Europa, comu è risaputu.

Oramai però li confini s’allargaru,
 semu Europei, a chistu ni purtaru,
 ‘un semo chiù sulamenti italiani
 e cu’ i vicini semu a sentiri parenti, anchi luntani.

Siccome poi tanti vannu (macari pi’ necessità) fora paisi a travagghiari
 li linguì stranieri s’appriru a ‘mparari
 speci lu ‘nglisi universali addivintatu
 e perciò la genti cancia bannera, va ‘nta nautru statu!

E sparpagghiannusi ognarunu ccà e ddà
 unni è chiù la patria ‘un si sa,
 lu tempu di lu patriottismu, ahimia, finiu,
 oramai la patria è.....unni voli Diu!



LIBBERTÀ

Piaci a tanti, di natura, di vuliri cumannari
e pi' curpa d'un potenti tanti peni s'han duvutu suppartari,

liggi e liggi, privazioni - chistu nenti, chiddu è vietatu
è pi' beru tuttu tortu, ognarunu è disperatu.

Quantu poveri mischini foru un tempu in schiavitù
verri e lotti s'hannu fattu, di luttu e morti 'un si nni po' chiù

C'è ancora picca libbertà puru e' tempi nostri attuali,
tanta genti cerca sempri d'acchiappalla proprio all'ali.

Lu Signuri fici l'omu d'iddu stessu lu patruni
certi reguli li retti ma pi' ordini e ragioni.

Libbertà è 'na bannera chi ogni omu voli purtari
è la cosa chiù preziosa e 'un ci vulemu rinunziari.

Sulu i pinzeri di la menti senza nudda suggizzioni
vannu, vennu, dunnì vonnu, pi' qualsiasi direzioni!



CONSALA COMU VOI...

Metti spezi, metti aromi, condimenti, giustu sali
 e certi pitanzi, d'accussi addiventanu speciali.
 Cucinari bonu è arti, arricriari lu palatu
 cu' l'amuri, 'a fantasia è talentu anticchia innatu.
 Ma si coci la cucuzza, metti tanti di 'ngredienti,
 lu sapuri è sempri 'u stessu, nun cunchiuri quasi nenti.
 Accussi pi' certi cristiani, chi la testa hannu di chiovu,
 si li cerchi di canciari, lu ciriveddu fari novu,
 fai di tuttu, 'a prima cosa: aggiustari 'u modu di fari,
 migliorari lu linguaggiu, pi' accussi megghiu parlari.
 Ma la testa è sempri chidda, leva, metti, lima, aggiusta
 cu' tanta bona volontà, poi 'u cervellu truppica e truzza,
 consi un pocu, forse sì, ma iddu arresta sempri e sulu
'na cucuzza!



MUNNU NICU....

Mi capita, speci 'ncampagna e di staciuni
di stari a riflettiri, osservari macari, qualchi agnuni.
E m'addivertu a taljari li furmiculi
chi trasportanu munnichi e autri "articali":

pizzudda di ligna, di pagghia, insetti, coccia di furmentu,
tutti 'nfilati o sparpagghiati, veloci o a rilentu.

Aisannu l'occhi osservu un ragniteddu
chi pisciau 'na musca e n'altu 'nsettu puvireddu

pi' farisi a so' ricca colazioni,
senza fiurarisi chi po' veniri a tentazioni,

comu veni a mia, chi staju a taljari,
di lassallu anticchia addiunu, lu so' "cibu" libberari.

Sentu un - ci ci - chi di autu si spanni,
taliannu attenta, 'ntra li fogghi du ceusu ranni,

si viri svulazzari n'acidduzzu tuttu scantatu
picchi un gattu lu sta puntannu, lu scumunicatu.

Jò senza perdi tempu l'assicutu,
pigghiannu lu attu pi' la cura di unn' è appinnutu

e lu lassu sciddicari di la rama unn'è appizzatu
mentri cerca di muzzicarimi, arrabbiatu.



Ma jò soddisfatta l'aceddu viù vulari
e cuntenta d'avillu pututu 'ntempu salvari

mi votu a taljari supra un çiuri
na' farfalluzza tantu graziusa di culuri.



Ma eccu chi un profumu di pani friscu, di furnarìa
mi fa girari versu la casa chiù vicina a chidda mia,

e viù veniri 'nta stratella 'a me' vicina
chi porta qualchi cosa cummigghiata da' mappina.

M'affacciu du cancellu e idda rirennu mi proi u' so' rialu
jò lu pigghiu, la ringraziu e cu' sulu 'u çiavuru già scialu:

è 'na vustedda appena sfurnata,
chi stiornu farà ricca a' me' tavulata.

Chi momenti di paci, d'armonia!
Lu munnu è tuttu ccà, è 'nmanu mia.



I ME' NIPUTI

Ancora picciotti mei, siti assai nichì,
ma già capisciu un pocu comu sariti.

Ruggero, lu primu c'arrivau
e chi subitu 'u me' cori s'arrubbau,

è beddu, sapuritu, aristocraticu, eleganti,
bravu a la scola, tranquillu, risarbatu, sempri pimpanti.

Assai vicinu è nonni chi un pocu l'hannu crisciutu,
ha statu un cumpagnu pi' iddi 'mportanti e benvolutu.

Quantu ha jucatu cu' mia, puru o' palluni,
'nte vacanzi sempri cu' i nonni cuntintuni.

Ora è grannuzzu, avi amici, cumpagni, 'mpegni novi,
joca o' computer, sturia a chitarra, va a canoa, sempri si movi.

Larsen, lu niputeddu -furasteri-
chi viu spissu o' computer, o si ci vaju, o si iddu veni,

è simpaticu, apertu, assai spiciusu,
biunnu, ricciutu, cu' un sorrisu luminusu,

infatti l'occhi soi vispi, ririnu comu chiddi d'un furettu
e jò, certi voti, lu chiamu u me' "follettu."



Ci piaci assai spissu disignari,
cu' sapi s'un jornu putissi 'n'artista divintari.

Avi di machineddi na' vera collezioni,
capisci l'italianu, ma parla a' lingua di la so' nazioni.

Però l'affettu, l'amuri 'u stessu ni fannu capiri,
quannu s'abbrazzamu sapemu tutti rui soccu vulemu riri.

La chiù nica, **Maria Vittoria**, niputedda sempri allegra, sorridenti,
è un cocciu di focu, mai ferma, tuttu tocca e mai nun senti.

È 'na birbanti chi ti talia cu' l'occhi puntuti,
pari ti pigghia in giru e si nun l'ascuti,

idda ti fa la testa tanta e nun s'accuntenta,
si nun ci runi cuntutu, nun ci runi rienza.

Si fa amari pi' la so' simpatia e vivacità,
anchi si fa stancari, è facili vulilla beni, a virità.

Crisciti niputeddi mei, sani, boni e speru puru furtunati,
pozzu sulu immaginarivi ranni e assistemati.

Crisciti onesti, giuriziusi, pinzannu chi la vita è na' conquista,
chi lu bon sensu, la bona volontà sunnu primi di la lista

di li cosi chi nun s'hannu mai a scurdari,
chi 'nsemmula a la sensibilità, sunnu li forzi pi' campari!

INDICE

Taljannusi ‘ntunnu	Pag. 13
Lu surci e lu latru	Pag. 14
‘I gnòcculi	Pag. 16
Casuzza	Pag. 17
Ma lu matrimoniu socch’è?	Pag. 18
‘A littra	Pag. 19
Ah ... accussì! ognunu pi’ l’affari so’	Pag. 20
Cosi d’ogni jornu	Pag. 21
Saggizza	Pag. 22
Si ascuti ‘u mari	Pag. 24
Lu tramuntu di la vita	Pag. 25
Stidda lucenti	Pag. 26
‘A luci da luna	Pag. 27
‘A facci da luna	Pag. 28
‘A pennichella	Pag. 30
Ventu nostru di sciroccu	Pag. 32
8 marzu	Pag. 34
Tempu persu	Pag. 35
Vicchiaia	Pag. 36
La ‘mpurtanza di lu sportu	Pag. 38
‘U cellulari	Pag. 39
‘A parulazza	Pag. 40
Amicizia	Pag. 42
E ... accussì si campa cuntenti	Pag. 44
Un panorama di ... Sali	Pag. 46
Picchi	Pag. 47
Terra mia	Pag. 48
‘Addini o machineddi pi’ fari ova?	Pag. 49
Lu governu	Pag. 50
Matri	Pag. 52
Umanità	Pag. 53
... Cosi chi capitanu!... forsi è muggghi ‘un sapiri nenti?	Pag. 54
‘A minzogna	Pag. 56
Mancu lu puci	Pag. 58
E passa lu tempu e passanu li festi	Pag. 59
Euro - avventure	Pag. 60

Farsa	Pag. 62
Santu Valentinu	Pag. 64
Ritruvari 'i culura	Pag. 65
Un paisi tra ... li nuvuli	Pag. 66
A la surgiva	Pag. 68
La petra	Pag. 69
'A mennulidda	Pag. 70
C'era 'na vota Baghdad	Pag. 72
Ma unni sta stu' paisi?	Pag. 73
'A bedda staciuni	Pag. 74
'Un ha mai canciatu nenti	Pag. 75
Unni pozzu cchiù	Pag. 76
Er patriottismo	Pag. 77
Libbertà	Pag. 78
Consala comu voi	Pag. 79
Munnu nicu	Pag. 80
I me' niputi	Pag. 82